

晚

晴

移

詩

匯

晚晴簃詩匯卷六十三目錄

葉舒瑯

八首

謝芳連

五首

馮景

五首

鄭性

一首

梅文鼎

一首

彭績

十二首

尤怡

七首

楊晉

一首

馬元馭

一首

吳啟元

三首

吳瞻泰

五首

王錫

十首

畢海琬

三首

邵陵

三首

蘇春

二首

李滌

一首

林徵韓

十二首

李專

一首

胡學汪

五首

田寶發

三首

鄭挺

二首

王安修

十一首

錢佳 二首

丁廷煊 二首

高方 二首

查巖 二首

郭元鈺 三首

馬振垣 四首

朱令昭 二首

王敏 二首

言然 二首

趙以文 三首

江浩然 一首

施璫 二首

周泗 一首

張元昇 十首

金義植 五首

晚晴簃詩匯卷六十三

徐世昌

葉舒瑤字景鴻一字鏡泓吳江人貢生有分千詩鈔

詩話歸愚稱其詩規模宏闊議論卓越發源於韓愈笑怒罵無入不得發源於蘇而其規向最高幾欲出韓蘇以上窺少陵堂廡推挹太過轉失其真又其室吳斐華字雲素亦能詩沈選別裁錄其秋日村居七律一首

論古

陰符誦熟揣摩成十上終邀六印榮縱使有田皆負郭可能結舌事躬耕

挑得琴心正倦游墟邊尙典鸛鵲裘長門解爲他人賦卻惹閨中怨白頭

鼎足中原勢未分英雄魄力自超羣阿瞞眼底空餘子只

重孫郎與使君

發徑

發徑編籬窄似蝸閒中風物澹生涯新蔬乍翦頭番韭小  
雨如催二月花出谷禽方嬌喚友穿簾燕亦巧營家敬容  
殘客吾羞對只許門停好事車

讀杜白二集

子美千門厦香山萬里裘迴殊魏晉士熟醉但身謀

頽齡

頽齡猶駐荷天慈領略風光趁此時縮水釀如鵝破殼添  
棉柳似繭抽絲騰騰但博逢場健憤憤何妨見事遲調伏  
粗教塵累減只牽口業未拋詩

觀棋示友

花落銀缸下子遲莫將謬算費沈思風摧一角西南急可  
是推枰斂手時

滿盤黑白爛縱橫全局端資一著撐指點不教留劫在樵  
夫冷眼看分明

謝芳連字皆人別號香祖山人宜興人有畫溪西堂橐

詩話皆人詩境幽澹服依漁洋漁洋亦稱之有和其  
寄懷五言詩云秋眠池上亭竹暗通人語空吟小謝  
詩荆溪渺何處流目送飛鴻歷歷江南去  
歸愚謂其工短篇品地在色香臭味之外

### 宿山園

小雨松逕寒人歸夜深火宿鳥棲未安驚飛落山果

### 西溪道中寄友

日夕浮清溪時時望林屋孤舟移白蘂細雨聞雞鶩波涵  
遠山滅樹隱寒煙複倚楫想幽人城虛悵獨宿

溪村早起卽事同邵八丈子湘作

早起杏花白飯牛人出門野田多傍水深柳自爲村北屋  
盡耕稼服疇皆弟昆爨煙猶未散林鳥亂朝嗽

孟夏山莊晚坐

孟夏變物候景仄風光稀石林湛雨氣山月連陽暉鳥語  
徧幽澗人聲隔翠微彈琴遲漁者衣上落英飛

溪村欲雪忽憶朱竹垞太史小長蘆捕魚幽興遙寄  
水冷小長蘆漁舟自容與舳際下鷗鷁銜魚向何許煙暝  
雪將來如聞隔蘆語

馮景字山公一字少渠錢塘人監生有解春集

詩話山公於學無所不  
窺工古文尤長於說經

簡慰天濤

先生仰面歎華屋手抱遺經常獨宿盡日集庭聞鳥呼中  
宵掀窗來鹿觸我常蹋月望西園寒星寂寞垂短垣徑約  
汪君信闊步青田壺塢三崑崙名勝清言若遇王平子絕倒  
當年定如此稽古豈無春卿榮隨學尙有公超市先生不  
樂句羞素餐先生毋躁句且少安晝居于內侍湯藥不然  
詎肯輕儒冠病鶴支離堪對語翩翩平原在何許

辭青門學士別業卜居木場巷

廊成分宅兩年留弱喪懷居也自羞鵬鳥暫爲六月息鷦  
鷯祇愛一枝幽甌牆加堊新淘井矮屋修梯籬葺樓從此  
便堪容膝老掘金燒杵復何求

苦雨贈方爰甫

精醫喜  
談禪

苦雨連宵困積陰練川高士共開襟相攜水閣閒垂釣獨



坐藤牀靜鼓琴投劑定知醫國手談禪全得法王心蠶荒  
麥爛秧難插何藥能消四野稊

春日同吳中山嵩沈雷臣中震數飲趙公子閒閒軒

時新築成雜詠

又灑簾蠶涇翠微合樽促坐酌空幃韭青松鴨波稜美筍  
白花豬蕈耳肥點水蜻蜓才一至出檐蝙蝠尙孤飛梨花  
寒食淒涼夜時公子喪偶共醉華胥未忍歸

入樊中登後樂山望千竿園

瓦綠魚鱗竹屋低虹梁高互絕攀躋倒垂柏葉張青蓋亂  
點薇花簇紫霓仙迹當年松化石南宋物祥徵昨夜鹿生麕  
蓬壺咫尺仙凡隔風動琅玕望欲迷

鄭性字義門號南谿慈谿人貢生有南谿偶刊

題枕

南雷未歿嘗語我人生須得三百年百年讀畢今昔書百  
年看徧名山川百年手提尺寸柄經綸揭地還掀天此語  
創聞真快絕非阿所好理當然我壽幾何未可卜縱符此  
數失在前三十六年忽已逝不逝安得逢良緣無論萬卷  
不能破一經尙未鑽其堅無論五岳道阻長四明密邇猶  
迤邐修齊自反方媿忤國與天下何遑焉曩者親宮祖垂  
耄我慙菽水悲臺泉邇年親歸旋卧病朝朝藥裏心倒懸  
何況年決無三百滿百之人便稱仙此生休矣尙何爲自  
歎空復時牽纏忽然想因此語幻第邀上帝鑒且憐枕成  
賚我一快夢南雷之語非徒然

梅文鼎字爾素號慎庵宣城人諸生

金聲坑地中得古審器

翠華金牌山鬱鬱生雲氣巨木盤幽崖村落聊位置將欲就山麓稍闢爲平地開基深尋丈忽得古藏器盆盂及瓶缶尊罍式各異玉質陶兼土樸拙非近製沈埋歷歲時完好色逾粹不知千年前此物誰所壅古云桑田更其說亦良是高下理相傾數極且自至何爲復區區蝸角爭名利辛苦銜西山填海學精衛

彭績字其凝號秋士長洲人有秋士先生遺藁

詩話秋士耿介絕俗其詩寄情孤冷取徑鐫刻汪大紳謂皆書世間事卻不著世間人一點意思深長東野浪仙之流也四言罕得合作秋士詩情醇茂特錄以存一格

桃花源詩

秦帝控長駕略地到天邊修心日以廣惟壽非力延樓船

載徐市海島尋神仙神仙何茫茫使者亦不旋豈知寰區  
內乃有桃花源桃源獨無依自在如雲煙花開始皇時水  
流太元間耆稚皆歡喜世世還復然何人此問津作記世  
共傳

戲簡族子葆元

觀君如有得意色尙孩童身隱南園內家貧五字中新年  
從幼識舊姓此生同何不時來過門前道路通

虎邱暮歸

林壑忽焉暝歸心鳥共飛日將萬景落雲載一峯歸入市  
亂鐙照前村驅犢稀行行蓬屋近草露晃秋衣

幽興貽任文田

清鐘動幽興日暮薜衣寒寂寂入松路遙遙分翠巒白雲

茅屋潤黃葉野秋乾想見高人坐孤琴時一彈

停雲四章贈允初

靄靄停雲悠悠我思襲我春服好風時吹我征車至乃入  
園扉鳥鳴嘉木魚躍清池其物欣欣其人在斯

我息其廬話言詩書寒葵載刈旨酒盈壺以觴以詠其樂  
于于淒淒風雨笥衣授余乃空汝牀曰安我居

飄風及雨詰旦乃已我晨斯興於閣閒止閱彼南畝實活  
我士和澤之降河水瀰瀰息彼黃牛我心之喜

庭列松篁日翳軒窗有鳥于飛好音旁皇薄言旋反尋樂  
未央嘉子棲遲好學無荒問我瑤華心焉弗忘

曉霽

清風散泔雲初日照高樹殘花石上委微溜田間注人語

雜禽言一帆開野渡

登靈巖

秋殿閉空香天風吹高嶺身立松景寒目蕩湖光冷

夢游山澤間得照水景不乾句既寤爲賦是詩

絕境所未到魂夢來盤桓當風形易脆照水景不乾草芽  
出春氣松蔭生暮寒言詠坐盤石泠泠古琴彈方欣隔囂  
滓寐覺爲感歎誓將山澤處州府不來還

步月

碎碎北飛雪欲盡完完東上月無羣獨來清野遙然步萬  
景千聲一見聞

尤怡字在涇一字拙吾長洲人有北田吟藁

顧俠君曰吾鄉詩學屢變向來後生厭常喜新往往  
尊宋而詆唐流入江西一派務爲生澁險僻其弊也

如村夫掉文俗不可耐余倡間邱詩社大聲疾呼專  
以少陵爲宗而博采昌黎香山東坡諸大家以窮其  
變自是俗學漸移近見一二有志之士高自位置景  
仰盛唐諸公而學者多束書不觀惟描頭畫角襲其  
詞調而失其神采其弊也王孟韋柳不過如玉溪生  
供人擗摺而已詩尙可問哉在涇克自洗濯業精而  
工專詞簡而意遠一切俗學不能汨其性靈詩家之  
上乘也沈歸愚曰在京就韓伯休術欲晦姓名詩  
亦不求人知而重其詩者謂  
得唐賢三昧遠近無異詞云  
詩話歸愚序北田詩與甫里周欽萊並稱擬之皮陸  
北田稟後附刻甯國洪均嘯夫東岸吟稟一卷有迂  
邨周準序蓋久客吳中同在北郭吟社者詩格略相  
近其對酒云漫將湖上柳認作故園春謁韋刺史祠  
云孤懷清似水五字澹如秋過澗上先生草堂云天  
地無情空放眼市朝雖好不爲家謂徐枋昭法也

山居雜興

晨起草木溼林霏散清曙始知東峯雲夜作澗上雨光風  
葉上汎新泉草下注羣鳥林際鳴游魚水面聚萬物各有  
分勞生轉多慕倖中成虛名多爲來者誤君看區中緣擾

擾曷有數

秋雁篇

金河八月清霜度鴻雁嗷嗷引征路初從塞北辭黃雲旋  
向江南認紅樹紅樹黃雲萬里程秋風歲歲事南征風起  
沙頭見清影月明天畔聞孤聲此去汀洲宿何所蒼梧雲  
深夜來雨休言田野多稻梁須識江湖有網罟珠簾翠幕  
誰家樓美人初捲珊瑚鉤一片乍橫江上影數聲猶帶塞  
門秋忽憶征人磧中見書成不寄情空亂知君遙心愁共  
飛思君遠目迷方斷目斷心飛人不歸年年空自寄相思  
儻念空閨人獨夜夢回無語雁來時

寶劍

寶劍芙蓉鏤韜光匣裏橫星辰秋忽動風雨夜還驚邊郡



今多事故人方遠征徘徊欲相贈不獨爲平生

潤州城頭晚眺

高城一面擁橫流客思遙將晚色愁千嶂雲霞方落日大江濤浪欲驚秋豈無鐵鎖防飛渡亦有牙旗鎮上游六代紛紛竟何有斷帆漁火在瓜洲

秋晚登樓

澹雲含雨過城頭獨自凭闌豁遠眸萬木秋聲來大壑亂山寒色上危樓登臨不爲依人感搖落應添攬鏡愁聞道菊花堪泛酒共誰來此一消憂

江上聞笛

滄江秋霽暮煙消玉笛頻催客思遙回首姑蘇愁不見海門明月上寒潮

記得

麴塵微漾薄寒天  
脈脈情懷似去年  
記得蘭橈送君去  
東風新柳板橋邊

楊晉字子鶴號西亭常熟人

詩話西亭爲石谷高弟畫入能品石谷每有鉅製點綴人物器具多出其手詩不多作亦有韻致

題元人張天禎墨牡丹

筆底分明一畫禪  
洛陽花色動雲煙  
古人不與春同去  
流落人間二百年

馬元馭字扶曦號天虞山人常熟人

詩話扶曦畫法南田逸筆寫生爲世所稱兼工詩有詠梅句云無風有月尋常事難得人間對此花意境脫俗

自題桃花鵲鴿

碧雨千絲灞岸低  
赤欄橋畔畫樓西  
飛來枝上雙鸚鵡  
不到濃陰不肯颺

吳啟元字青霞績溪人有秀濯堂詩

甲戌廣陽花朝

我亦江南客  
逢春倍惜春  
此時楊柳樹  
一望正愁人  
社鼓家家酒  
桃花處處津  
東風待歸騎  
決計莫逡巡

同人九日登慈仁寺樓用博問亭將軍韻

涼風吹綠草  
如我鬢星星  
一片寒山色  
秋來不耐青  
夕陽明遠水  
落葉下疏櫺  
又負茱萸約  
誰登木末亭

春雲得歌字應紅蘭主人教

輕暎輕寒翦綠莎  
春雲斜壓畫闌多  
杏花雨外霏微起  
楊柳風前澹蕩過  
御苑晴生芳徑溼  
宮牆低度午陰和  
玉樓

正在鶯聲裏間裊紅窗一曲歌

吳瞻泰字東巖歙縣人諸生

詩話東巖詩無專集卽附其叔綺園白華四明等集之後又嘗隨綺園游黃山有黃山唱和詩沈歸愚云東巖爲大司成麟潭先生長子留心經術思爲世用入省闈十五終不遇乃遊游齊魯燕冀江漢吳楚閩越所至覽其山川名勝詩品日高著有彙注陶詩陶詩提要刪補選注等書

五月二日自大浹江出海

威遠城邊出蒼茫烽火臺魚真挾浪起人自御風來萬里孤帆遠三山一夕開平生懷壯志擊楫興悠哉

普陀寺贈潮音上人

蓮花洋外矗香臺片片青蓮渡一杯日射琳宮光似鏡  
驚花雨吼如雷鯨人負蚌投荒去龍女含珠聽梵來徐市求仙終縹緲詎知三島法雲開

雨中過鎮海寺訪別庵上人

林樾散清陰積翠霑涼露濛濛光曦峯下有化人住紺宇  
新崢嶸鴿王長布濩錫飛自夔州海角傳杯渡聽法馴魚  
龍忘機狎鷗鷺昨夜雨霏微瀑灑寒泉樹濡足就支公示  
我滄洲路同徑溜雨橋瘦杖孤雲去

梵音洞

磅礴驚恨鼓杳冥散煙霧下有龍伯驅上有珠簾布神椎  
傑石裂脈脈不得渡初睇根虛無黯黯漸有過衣袖妙莊  
嚴金人宛鎔鑄移時法相微翛然自來去平生耳齊諧景  
純山海注幻影驚盲聾謫誕理亦具長嘯凌層霄海鶴高  
騫翥

寶山行

冬青鬱鬱空山裏種樹何年星在尾餘哀散作冬青引弓  
劍橋山飛不起月黑林昏鬼搏人捧香天騎寒食死玉魚  
金枕出人間蘭亭玉匣亦如此獨憐竺國經可哀六帝園  
陵一日毀嗚呼國家養士百年中剩得遺民號蒼穹杜鵑  
聲碎巖花落片雲飛出越江東銀牌竹夾歸何許白石編  
同晞髮翁欲令殺青徧宇宙長與茲山高從龍前年重梓白石樵詩  
王錫字百朋仁和人諸生有嘯竹堂集

沈歸愚曰古今體詩俱有家數入西泠諸子中亦爲上驕而名不出里巷余往來浙西人無道及姓字者知名家而湮沒者正有其人也  
詩話百朋詩格純正雅近唐人康熙癸未翠華南幸百朋獻詩行宮深蒙嘉賞毛大可朱竹垞爲之訂藁其集句詩竹垞謂天造地設自然渾成

夏夜徑山退上人蘭若納涼

一入清涼境不知有炎熱山深雲氣濃松茂月痕缺煩滌  
陰澗風寒生幽崖雪坐久身心閒禪鐙半明滅旣遠紅塵  
網復遇青蓮舌相與談空空性真亦了徹

夜宿石人塢鍾氏霽峯書屋

入塢雲峯暝舉步迷原陸夕露零蔓草灑灑沾衣服寒鐙  
木杪青有人居空谷崎嶇遠叩門一犬吠茅屋山家見客  
投欣然便留宿婦子起爲炊須臾黃粱熟就枕及夜分虛  
齋秋氣肅落葉兼流泉聲徹幽獨乍疑風雨至清音振  
林麓蹊蹊哢高松鳥雀噪深竹孤懷悄以悲酣寢遜童僕  
冬曉登韜光禪院後山望晴雪

天地氣嚴凝出郭游人少踏雪登山巔凌虛縱遠眺萬戶  
炊煙遲奇景湛清曉竹折枝蒙密松危勢天矯足底多寒

雲眼前絕飛鳥風驚碧落間日出扶桑表千重越岫明一  
帶錢江小百里紛皚皚衆象爭皦皦積素射晴霞異光互  
迴繞目眩下高峯冥濛林壑杳舉首望精藍樓臺俱縹緲  
纔過合澗橋便到雲林寺泉石奇以秀疑非人間地不知  
萬木中亭榭更幽邃溪聲隔竹喧松色當樓翠鶴識嶺雲  
歸僧乘蘿月至巖阿許久留淡然忘名利

送友之河東

河東君有役把酒動遐思日月重華地煙霞孤竹祠一鞭  
心共遠千里夢應遲去去言難盡休忘握手時

秋仲淨慈寺夜游

白雲閒踏盡一徑到竹林草木逢秋澹山巒入夜深松風



聞梵語池月見禪心幽絕南屏勝高僧許共尋

丁卯中秋

去歲中秋節鎧前病劇身黃昏正風雨白首獨酸辛此日  
全微命高堂失老親不如垂死處尙見倚閨人

冷泉亭

小憩空亭戀翠微上方日暮客過稀春秋閱盡水長冷風  
雨到來山欲飛嶺半樹高猿每掛林間雲暝鶴知歸炎天  
坐久寒生骨思向僧家借衲衣

詠雪

朔雪舞迴風華凝香閣晚繡幕尙生寒人在龍沙遠

過李白廟

誰道謫仙狂豪情託舉觴目無高力士心識郭汾陽

畢海璠字崑朗號澗堂涪川人諸生有澗堂詩草

詩話澗堂爲畢公權解元世持子與王孝廉洪謀並秋谷弟子詩多經秋谷評定

穆陵關

貰酒旗亭愴旅顏蕭蕭人過穆陵關沙明不辨東西路雨  
霽纔分遠近山紅葉有聲秋漸老白雲無恙客應還常將  
幾點離人淚灑向西風落照間

清明山游

路折村橋一徑賒綠楊輕颺酒帘斜暝風細雨催寒食開  
徧青山郁李花

嚴州

天涯游子去惛惛一夜輕舟趁曉風江入桐廬山四束橘  
花深處雨濛濛

邵陵字湘南一字孩叟常熟人有青門詩集

詩話康熙間有兩邵青門一邵子湘毗陵人一卽湘南皆負時名江安傅氏得寫本集十二卷有雍正癸丑天中山人序稱其長身修髯目閃閃狀貌如羽人劍客操不律東西游走恆挈家相隨所得輒緣手散去不復訾省晚年浮湛里中性益嗜酒卒至貧老以死蓋亦振奇之士與汪東山繹友善時相倡和歸愚別裁謂青門詩以流易爲工不出眼前景口頭語自能奕奕動人然一時宗其說者每流入打油釘鉸一派去風雅遠矣今慎擇一二以存其人

竹里復過山齋疊韻

槿籬敲側豆棚斜認得空山獨樹家  
半畝溼雲分竹色一庭深綠養苔花  
就涼几席新丸藥過雨軒窗午焙茶  
準擬與君同結隱三間老屋把茅遮

江天寺

半空蜃氣結樓臺漚裏須彌亦壯哉  
很石未能超海去怒

濤直欲上山來雲堂暮鼓齋時動煙渚秋帆雨後開試向  
江天亭外望似萍身世實堪哀

破山茶話

山光潭影冷清暉坐久新涼欲襲衣忽慢推窗滿庭月六  
朝松老樹陰稀

蘇春字倫五上饒人有饑鳳集

毛大可曰余在史館得吾友王裕日謂其門下得士  
彼時卽耳熟蘇倫五之名迨乞歸始與倫五會於西  
湖之上倫五雖出南施北宋之後曾游王新城之門  
與孔東塘之往返鏤戶潛修故世未獲覩威鳳之一  
羽文豹之一斑也

銅臺鋪晚眺

孤城郭外眺煙波日落雲寒朔氣多四海萍踪人易老萬  
山雪色雁初過穆陵壯氣連邊塞漳水分流納衛河更值

天涯將歲暮平生心事獨悲歌

海子清明

淑景遙看御苑賒春犁初動路紋斜低飛塞雁連絲雨繁  
蕊山桃發瘦花草際酒痕晴上塚帽簷柳葉晚歸家凋零  
親串松楸夢閒倚東風鬢亦華

李滌字紹溟厯城人諸生

詩話紹溟爲滄溟六世孫滄溟沒後姬人卽苦飢寒  
後嗣式微可見乃數傳而後猶有耳孫能詩者愚山  
嘗爲置奉祀生與紹溟輩行  
高下族屬親疏皆不可攷

秋夜白雪樓有感

明月松間出危樓獨自看泉聲當暮急山色入秋寒白雪  
先聲在青箱世業難葛衣寥落甚沾臆淚闌干

林徵韓字退思別號禪伏山人昌黎人有忘餘草

詩話退思其先爲閩人遊亂幕游足跡幾徧天下愛  
畿東山水卜居昌黎禪伏山終老焉詩亦灑脫自唐  
不拘常格  
肖其爲人

### 挑野菜歌

日穿花影碎村犬花外吠一起南村來婦女裝成隊小兒  
懷在懷大兒背在背右手持彎弓左手張闊袋下我村北  
田挑我田中菜菜花香可憐菜葉青可愛但苦根不肥天  
旱失灌溉饑多難普療人多不一輩得挑時且挑盡我此  
田內三五村東頭誰家鄰姊妹相邀鬪草來各擷幽芳在  
金釵落翠鬢坐地成賭賽嫣然一笑間春風生萬態那知  
挑菜人當年亦粉黛

### 換馬行

馬蹏落地滾塵埃道是天使天上來未許郵符先及見直

呼換馬聲連催馬到當換故不換下馬索取常例看但須  
一貫就腰纏無語飽飫郵亭飯飯罷曾不少遷延上馬還  
須惜馬錢走馬城邊立馬上手折楊柳當馬鞭前站前去  
不須與後到一起是行廚朝廷供給有正項額外別尋達  
刺蘇醉後向人口饒饒是人遇之遭鞭敲稍有不如需索  
意拚死騎將驛馬跑天使後來無一語只是顏色多驕倨  
公然下馬坐縣堂換馬從容上馬去

### 草涼驛

客路當春晚林昏鳥競譁野田初著雨山鳴半桃花種植  
無多地生存只數家不知今夜酒端欲向誰賒

### 益門

八百連雲棧經過始益門水乾溪有路煙冷樹無村怪石

頻驚馬空山獨唳猿可堪林莽下清晝也黃昏

扁道

百尺清溪上陰崖石磴懸水聲人語亂山骨馬蹏穿世路  
偏多險風塵獨有年那能無間阻書劍自飄然

黔西道中

暗雨黔西路凌晨結伴行馬蹏循虎跡人語雜猿聲舊里  
餘荒井空山冷廢城不毛嗟此地禁得幾塵兵

大湓灘

大湓灘上下灘舟爲試風波入亂流千嶂日昏三楚雨一  
潭雲冷九溪秋當年去國家曾破別路依人志未酬何事  
丈夫長慷慨身輕萬里當閒游

輓孫豹人先生



已視榮名作等閒辟書何事下松關葛巾野服朝天去明月清風引杖還冠蓋豈能羈白髮墓門猶喜對青山憑誰題碣留私諡好置先生夷惠間

盱川夜泛

兩行疏柳夾河橋且就輕波試短橈船小不容多載酒月明何處一吹簫沙鷗水次依眠穩野鶴天空入夢遙終夜自醒還自醉那關愁長與愁消

除夜

萬里從教滯此身廿年爲客慣風塵甯須濁酒澆殘夜且與寒花作比鄰歸去夢魂知路遠老來兒女覺情真家家守歲明鐙坐我亦他鄉度歲人

雜詠

不用尋詩過嶺西日來幽事頗堪題松間拾菌雲遮路雨  
後曾魚水滿溪偶乞瓶花從野衲時需斗酒問山妻行將  
策杖看禾去只恐磽田綠未齊

### 釣魚

雖是釣魚人不入漁人夥時與牧牛兒溪頭爭石坐

### 李專字知山遵義人拔貢有白雲詩集

詩話知山狷介好出游偏厭黔楚蜀吳越燕趙遠  
至甘涼鄂文端集中有送知山歸蜀詩相逢鎮自笑  
鹽蘗夔府孤城老更宜應似少陵長在蜀居然子固  
更能詩文追屈宋知何用道出義皇舊已癡別後巴  
州須記取昆明涼夜泥君時知山與修四川通  
志蓋流寓成都稍久自蜀游滇文端送之歸也

### 都門訪樊崑來侍讀

芳杜洲邊叫子規滿城宮柳綠參差曾爲王粲登樓處尙  
憶中郎倒屣時几水重逢成人別羅浮竊聽有新詩魚書

一向無由寄最喜今朝近鳳池

胡學汪初名學望字小牙五開衛人貢生有求志軒集

詩話五開衛初隸湖廣雍正間改屬貴州裁衛設開泰縣小牙詩格老蒼黎伯庸兆勳官開泰校官輯黎平四家詩以小牙爲第一

思州行爲鎮遠袁功懋賦

寒山翼徑來環徑繞清泚越岡若異態共是此溪水野桃  
繚亂開翠篠密於芑苔銅荒碑斷蘆封古橋圯堦垣三四  
見蕭蕭一城峙兩水合汀際孤舟向沙艤度津入古垣曲  
巷僅容履喧寂雖各殊臺笠盡入市縱懷乞米書施之得  
糠粃坡公煮肉法於此無可使煩襟鬱愁滋悅然望溪水  
明月牛渚情適有袁夫子

再飲泉遇雨

卻暑遂忘倦浩然臨水湄花香添舊路微雨濯新詩雲至  
既如晤我來甯有期閒人向余笑兩度飲寒漪

避暑小飲怡園

強酒都緣好釣詩怡園分韻晚涼時傍林幽鳥如知倦藉  
草鳴蛙擬爲私未約雲來池半畝不因風動竹千枝翠微  
平遠無忙步明月多情最踐期

重過平越高真觀

溪流常自繞荒陴灌木危樓是昔時爲客不堪仙事警此  
身難向劫前知苔封碣石先朝色風遞泉香出世姿要得  
彌明同煮鼎蒼蠅聲裏漫敲詩

貴筑旅春卽事

年年寒食疊征衫短髮違心頗耐芟枕上鄉思碎鳴柝夢

中歸路越巉巖敝裘笑我酬疏酒粗糲旁人勸老饒欲達  
平安未成句破窗風雨護鐙函

田寶發字梅嶼合肥人諸生有玉禾山人詩集

詩話梅嶼早歲見賞於陳滄洲聖祖南巡迎鑾  
獻詩蒙駐輦詳詢鄉里而留其冊卒以諸生老

管仲

檻車不數尺迺容天下才時無鮑叔牙霸術終焉埋射鉤  
棄舊怨度量何遠哉人生貴知遇安用悲蒿萊

虞卿

抵掌易高位簪屨匪所恥故友中夜來趙相若敝屣著書  
常閉門窮愁乃可喜曰卿何如人惜哉魏公子

春日彭城道中

落日巖城咽大河美人何處帳中歌書生不管興亡事只

愛春山青較多

鄭挺字不羣秀水人有秦濤居士詩集

有感

莫遣黑雲遮白日誰教濁水亂清泉鼎能自愛方無價璧有微瑕不值錢

夜過釣臺

新主已忘天子貴先生猶道布衣尊中興將相功成後何不被裘共此村

王安修初名文治字後村歙縣人諸生有後村詩集吳越游草

詩話後村以詩才名白下其吳越游草諸作飄逸清遠出入韋孟中年絕意場屋潛志文史而早衰多病迭遭喪訟哀樂歌哭一託諸詩多可傳者

梁臺城歌

東西華門血沒腕湘東一目倚柱觀掘尾狗子何太狂斗  
鹽置腹免肉爛江南老公自貽患晉陽小兒知合變亡猿  
賈禍及林木朱异納金蕭傅諫閉桁反袍臨賀王可憐羊  
侃來酣戰王謝門高良非偶溧陽何意持紅綫淨居索蜜  
雀穀空永福賣咨淚如霰三度舍身此日休百萬爲魚悲  
淮甸毒螫滿懷將自斃況復一門親戚叛得失自我真何  
恨盛衰過眼驚飛電臺城蔓草積悲涼野老荷鋤耕廢殿  
鍾山慘淡昏雲煙湖水黏天叫秋雁憶昔空函定上流何  
來跋賊覆金甌天命暫歸陳都督終見王韶鎮蔣州

九天祠後園曝背見園中洗菜者率爾感賦

雲散天彌迴旭日滿江城荒園交古木幽禽相向鳴曝背

坐盤石倏然病骨輕晚菰森玉立採擇趁冬晴池水寒可  
濯沿流笑語聲比鄰更助力小憩依松棚場圃淨如滌嚴  
風掃殘莖禦冬仰旨蓄齏鹽无他羸閉塞委天道勤渠媿  
物情晚計良自得吾亦念吾生晚晚歲云晏溲落將何成

打碟子歌

秦淮水滿桃根愁短衫禿袖橫輕舟新聲爛漫煩手集材  
童弦索紛嘲啁中有一技更奇絕非絲非竹喧中流聯綿  
嘈囋巧應節輕撚急擊隨狂謳眩精駭耳暢絡繹浮音靡  
靡哀篴篥林深霧暗黃鶯轉天空日暮游絲柔芭蕉急雨  
聞夜半斜飛密灑驚窮秋或云謝后妒飛燕玉甌犀箸風  
颭颭謝后以文犀箸擊玉甌爲歸風送遠之曲又云郭生擊邢越叢鈴碎珮語  
幽修唐郭道源善擊甌邢越皆甌名坐覺鐙船簫鼓咽轉令坊市爭嚙咻



腐儒聞之三歎息雷鳴瓦釜黃鍾羞安得鯨音鏗六合一  
破兒女聲啾啾

題舍弟師澹月榭

偶地逢清曠披襟謝毒塵竹煙浮檻細鳥語傍簷馴日暮  
雲連屋樓高月近人寂寥城市夜坐對露華新

方山朝雪用昌黎山石詩韻

羣峯積雪朝日微寒光暗天鴉不飛雲卧乍覺衣裘薄山  
餐耐可辭鮮肥平生性癖耽冰雪況復山行所見稀縱心  
皓然策幾隊蹇驢齧冰苦朝饑高原下隰渾莫辨千村煙  
火靜柴扉岡巒凜慄氣已結林枯枝折餘霧霏淒神寒骨  
非人世底須輾轉夸妓圍崖傾澗響更幽絕嚴風激瀑霑  
人衣此時放懷凌八極有如天馬脫羶韉稚川仙去丹竈

冷空山獨往將安歸

山有葛洪煉丹遺蹟

前明黃將軍歌

公名金臺字伯修休甯人登崇禎癸未科武進士榜受知烈皇帝南都建

握大鎮駐師京口見朝政日紊亡形已具棄官出浙江入閩廣知其無成遂隱居衡嶽祝髮為僧時登高長嘯旁若無人十餘年不與世事亦無有知呼之者惟以母喪未葬晚年貽書故人冀襄厥事也間以其傳示余屬為兼之矣余姓壻運滄其族子南侯黃得功事靖南與公同姓皆武臣中知節概能自立者故牽連及之為長歌一首竊謂如將軍者固靖南所深許而靖南之忠勇壯烈赫然驚人當亦將軍所樂為同調者也既書此報運滄并題數行以識余感云時戊戌閏八月望後四日

金陵王氣歸何許渡江一馬化為鼠無愁日日醉深宮跋

扈人人開幕府忠勇爭推黃虎山

黃得功字虎山

百戰威名震吳

楚螻蟻授命鬼神驚虎山虎山真如虎緬維江夏多奇人

更有新安伯修甫蚤掇巍科恩遇深皇帝曰予有禦侮拜

官幾日國旋亡勤王有志人共覩建牙京口望中興生不  
逢時將奚補斬王一去江空流波光慘淡悲桴鼓權臣在  
朝功鮮成長使英雄淚如雨棟折榱崩大厦傾空憐腐木  
相撐拄崎嶇萬里蚤見機蘊義懷貞思遠舉衡山何必非  
西山托鉢採薇心獨苦一彈指頃見滄桑猿鶴沙蟲何足  
數掀髯一嘯洞庭波嘯罷淒然懷故主回首龍髯杳莫攀  
關心馬鬣勞區處由來忠孝貫儒釋佛法無多誰領取古  
人殉國各有道或死或生何齟齬虎山死與方景齊伯修  
生與雪庵伍生死不同同自靖兩黃將軍并千古君不見  
石鑄愁雲暗江渚青衣肉袒面如土花馬何心爭拜舞嗚  
呼兩黃將軍并千古

游牛首

舊識牛頭路籃輿一散襟千村花霧合一徑竹煙深僧梵  
空中響樵歌世外心白雲聊駐足款款話幽尋  
鳥道荒煙外天風颯滿林空江涵雨霽疊嶂帶雲陰樓閣  
爭高下松杉自古今舊游渾似夢一笑更登臨

西風嶺

暮色上西嶺蒼然滿平楚落照四山昏天闕翠可覩樓閣  
鬱參差嵐氣翳復吐雲外度鐘聲煙中識樵語回首眈眈  
茫江流自終古

過天盤嶺至祖堂山門望松林積雪淒神寒骨山谷  
炯映清景可愛

鐘聲來古寺遲我下天盤徑阻披雲入松高帶雪看浮光  
欺宵靄積照奪嶺旼日落風初勁諸天增暮寒

飲平山雙碧樓

把酒臨雙碧波光照眼明天風吹海月客思滿江聲塔護  
蛟龍睡門尋鷗鷺盟醉來幽興極漁笛暮煙橫

平山塔下江聲甚壯

相傳下有龍窟

錢佳字平衡號臨谷嘉善人諸生有遜溪詩鈔

陳燭門曰遜溪詩流出塵翳獨標性靈其淵冲瑩秀處極似錢劉而敷暢流轉半入於元白含毫吮墨清便映媚兼有流風同雪落花依草之致

自伏虎坪至白鹿庵

積溜昨方靜欣看朝暾烘披衣啟山窗山色逾玲瓏呼童  
蠟雙屐未老先扶筇危橋仄曲徑澄潭激微風相依只舅  
甥笑傲輕王公乍探蓬萊室復叩梵王宮怪石踞虎豹匹  
練飛長空懸磴三百級步步淩雲中小陂偶憩足洗耳響

潺淙千尺石筍綠半嶺山花紅行行厯崎嶇振衣入幽叢  
鬱彼殷石臺蠲潔無塵封天柱當其前大滌後峙雄危石  
瞰平陸幽蘭間青菰白雲迷遠岫濤聲沸長松山僧儘忘  
機兀坐對春融截竹引清澗啜茗譚從容人生忽如寄百  
歲會有窮戚戚將奚爲忙忙亦徒庸惜哉山水佳嘯傲輸  
雷宗終當謝世鞅卜築九鎖峯

春日病中

可惜三春麗偏爲二豎磨病因趨事少貧乃負人多每歎  
升沈異空嗟歲月過朝來試攬鏡星鬢更如何

丁廷烺字闇臣號易東嘉善人監生有恕齋詩鈔

詩話易東爲清惠公元孫工詩能畫嘗與同里錢  
佳輯魏塘詩陳自唐迄明論事知人足備文獻

太原秋日

商飈一夜發蕭瑟振高林沙漠連關塞河山輦古今有書  
應候雁無語更聽砧正值莼鱸好能忘故國心

荷花

碧幹濯清漣亭亭淨炎暑微雨晚來過香風滿汀渚

高方字義立號渠亭江陰人有于子道人集

詩話渠亭以書法得名好漫游寄情山水康熙季年  
至京師辭薦辟爲匡廬之游未至覆舟卒傳詩不多  
有致

秋闈首日八王允辭薦卽事漫賦

無心帖括求高第復上梁王卻聘書祇爲耽閒成疾疢非  
關傲世託耕鋤酒逢嘉會疏狂在秋滿長安寂寞餘自是  
不歸歸亦得北來南去任樵漁

杏花絕句呈太倉王顓庵相國

花開豔說上林姿二月街頭未賣時不是折來頭上插曲  
江春色有誰知

查曦字漢客天津人有珠風閣詩草

詩話漢客先世本歙人其祖僑居天津遂入泃籍趙  
秋谷吳天章並以詩名當康熙戊寅己卯間先後至  
津稱詩者翕然從之漢客與游其詩日進足  
跡半天下多厯奇偉之境胸次益廣詩益工  
病愈九日郊游

九日身初健西郊強一游遠山寒積雪孤樹老禁秋何地  
尋黃菊他鄉易白頭那堪高處望風色逼人愁

歸里偶題

故園芳草獨歸遲桃葉成陰柳影垂舊燕語闌春已遠新  
蟬聲動夏初宜輕紗細葛裁衣日小市長廊賣扇時趁此  
清和好天氣且投蓮社一題詩



郭元釭字于宮揚州人

商邱大中丞寓齋觀明宣宗黑白二鼠圖

高齋閒敞邛江濱紅檀小几無埃塵卻立況有班劍人何  
物上案登梓行昔者隆準太祖孫手提圖錄當乾坤寶跗  
妙蹟世莫倫揮毫幻出竊齧身一行欲前勢復蹲一似避  
匿穿墉奔一體兌色清如冰一秉正氣衣元纁唧啾小語  
若可聞欲穴寢廟窺髻盆錦窠裝褊潔可捫似此尙是無  
牙君吾聞宣皇業崢嶸寒夏論道揚歌賡滌除貪穢何諄  
諄窒塞倖路官箴清此輩意態如火明肢體毛髮傳其形  
麥鬚豆眼瞭然存鑄鼎象物神姦驚縱有甘口惡不悛白  
日肯許行成羣洪永大業誰陶鈞賴此敏手工洎皴後來  
爾雅蟲魚煩謂貽謂豹忘其真白日據社不可熏女奴飽

食睡思昏米脂盜食倉與困瓠肥不容丞相嗔一時暴闕  
黠鼠掀偷人目睛王其民衣冠齧碎食單貧此物與器同  
續紛周之成康漢景文唐稱貞觀宋仁神星羅棊布如排  
勻若宣豈是尋常生幽圖織婦歌南薰猗蘭招飲頒羣臣  
以類考之不待論公平東里光榮新

傾蓋亭

禾黍郊城道淒風人草草不見傾蓋賢秋原亭榭好一車  
將兩馬獨過長松下漠漠路旁塵蕭條望遠身平生愧牢  
落日暮但逢人

寄黃州許使君

平生睡足澤南州杜紫微言君似不人道小鮮逢敏手世  
傳雙鹿從遨頭終年茹菟朝餐足盡日池塘暮雨收從古

光黃多異士莫教迴避庾公樓

馬振垣字金城一字心城號石墅汝州人諸生有卧雲堂詩藁

詩話石墅受知學使湯西厓從游風穴白雲寺諸勝  
唱酬竟日所居城西夢花村築石墅卧雲堂養親讀  
書問字之履戶外常滿

游風穴寺因宿默上人方丈

山門穿雲入夾路竹松美迢遞度石橋樓閣凌空起中有  
默上人頗悉清淨理談經翠微中探珠碧海底天花如飛  
雪紛墜虛空裏繩牀肯相借黃昏同棲止蕭蕭佛火清琅  
璫鳴不已老僧聽溪聲禪心入流水愧余塵勞人詩酒徒  
自鄙願借金篴靈刮我眼中眯夜久諸天靜鐙花結孤蕊  
始知卧深山白雲冷衣被鐘鳴塵夢覺霞光東方紫無奈

逐羣動元悟何由始

紅毛酒歌

秦望山頭風夜吼一夕雪花深沒牖玉樓銀海徹骨寒石  
鼎金爐火不守主人飲我玻璃杯云是南海紅毛酒紅毛  
之酒紅於血色香異味三奇絕傾之一盞卽醺人葡萄椰  
子失芳冽紅毛之國在何許或是暹羅真臘伍綠醅初釀  
琉璃瓶一滴染指貴於琥聖人有道四海一異域傾誠貢  
上國萬里飛槎航海來巨鼇怪蛟奪不得我欲飲此乘興  
直上落迦巔指顧島嶼在目前蓬萊三山凌風到下視人  
世空茫然

閒居

秋色孤村靜石牀獨坐時蓼花紅入戶豆莢綠垂籬佳句

吟難穩新書讀易遲且沽鄰舍酒莫自負幽期

訪連冲碧不遇

村煙澹澹夕陽斜傍水柴門老樹遮坐久主人渾不見東風落盡碧桃花

朱令昭字次公號漆園別號維摩居士厯城人貢生有

冰壑集

詩話集中弔李于鱗七絕二首頗致辨香之意德州宋蒙泉爲序言其才思橫溢若洪河千里一曲不妨泥沙俱下又稱其能書畫工篆詩與高南村相伯仲

春夜對月

柳際微茫月神傷憶往年玉人臨綺席瓊管冰絃今夕空庭裏清光寒食前子規鳴不歇坐盡博山煙

瓜步

一篙春水綠於苔，鴨嘴船輕向晚開。  
渡口斜風吹細雨，春帆無數過江來。

王敏字好古滿洲旗人有聽花樓集

詩話好古家世貴顯少嘗供奉內廷以病免益折節讀書遂以林壑老詩風骨清迥雅近中晚唐

同貽叟夜坐

何處舊繁華，蹉跎歲月賒。  
故人雙鬢雪，寒夜一燈花。  
病欲居僧舍，愁堪卧酒家。  
擁爐閒話好，與子老煙霞。

送人歸村居

水際茅齋碧靄間，東風欲趁杏花還。  
一杯綠柳橋邊酒，十里斜陽馬上山。  
芳草送人何寂寂，晚鶯留客太關關。  
舊交零落新交少，爲說求閒未許閒。

言然字述子浙江山陰人有尊聞堂遺詩

詩話述子爲先賢大宗有學行工詩康熙辛卯江南學臣疏請賢裔宜予世襲當及述子述子投狀謂先世以守越留居人離墳墓請如前明衢州孔洙讓公爵與在曲阜者例士林稱之

### 金陵

埋金誰道帝星懸  
花草吳宮事渺傳  
百戰山河雄半壁  
六朝風雨冷殘年  
舉杯對酒原非策  
揮塵清談卻尙玄  
惟有秦惟一輪月  
夜深依舊照江天

### 登姑蘇城樓

雉堞晴開倚碧空  
百花深處館娃宮  
美人歌舞流雲外  
相國祠堂落照中  
野燒煙荒迷遠樹  
寒江沙漲起長風  
多情獨有青青草  
引得牛羊一徑通

### 趙以文字允明又字止庵錢塘人

詩話止庵工詩畫康熙癸巳游京師與繪萬壽盛典圖後出居庸關塞外花草悉圖之識其名而歸詩篇

甚富多  
佚不傳

夢歸吳山自鍾翠亭過半月池訪居雲處士得一澗

落花春水漫數峯殘照野雲閒之句醒而足之

故人何處掩柴關只在松陰鳥語間一澗落花春水漫數  
峯殘照野雲閒偶耕已負林中叟識路空憐夢裏山握手  
他時成一笑蕭蕭相對鬢毛斑

### 桃花嶺

暮宿嶺下村曉度村邊嶺危磴多盤紆羣峯競秀穎層疊  
聳峻岫週遭俯清迴肩輿一徑通亭午欣躋嶺石亂溪泉  
喧煙深崖樹與古藤垂復纏苦竹敲且挺迴看曉來途蒼  
茫隔雲影陰風歛吸來寒氣侵衣領空憶桃花春蕭蕭山  
谷冷衝寒陟崎嶇跼蹐不遑騁心神已屢驚吁嗟乎險境



如彼九折坂乘險語堪省長嘯歸去來明湖理煙艇

宿漁浦

漁浦乘潮泊蒲帆捲暮煙孤舟斜劃水危塔遠撐天客路  
方經日離情似隔年悽然成野宿愁夢繞江邊

江浩然字萬原號孟亭嘉興人諸生有北田詩臆

法梧門曰孟亭少喜讀竹垞詩屢試不利棄舉子業  
客諸幕府記覽日博注曝書亭集世推該洽詩如詠  
春風云愛他寄得多番信要路開門不世情題朱徽  
宗白鷹圖云毛羽何須誇白雪官家曾爲著青衣抒  
詞寄意皆極深刻

過王舍莊宋龍圖侍郎張揆隱處有讀書堂東坡題  
額今莫可踪跡矣以詩弔之

憑弔悲風幾白楊熙甯逸老舊時莊碑橫古道留殘照人  
記躬耕說侍郎有母克成偕隱志無兒難問讀書堂吟樓

更憶韓倉士一代于鱗亦渺茫

施璫字質存號隨村宣城人有隨村先生遺集

詩話隨村爲愚山孫是集原名剩圃其子蘂齋重輯遺詩杭堇浦爲訂正之隨村家學淵源天懷高曠詩多行役游觀之作而於家庭師友間尤親切篤至

望張二懇圯不至

小別驚年過情深攬夢思每當花發候便數爾行期澗水流香細林鳩喚雨遲柴荆誰午扣吟苦不成詩

吾廬和放翁卽用其首句

吾廬雖小亦佳哉鎮日人稀徑自苔山鳥聲依風色入庭花影共月光來筆牀茶竈隨錢辦藥圃瓜畦逐歲開況是謝公樓不遠夢餘聊復笑銜杯

周泗字磐石巴縣人諸生

詩話磬石幼慧賦黃鶴樓詩纔九歲弱冠爲諸生客授土酋家恃才傲物竟爲所害鸚鵡句實爲之懺也  
黃鶴樓

吾蜀青蓮曾擱筆今朝黃口敢言詩  
長江日月滔滔去大野風雲漠漠馳  
鸚鵡竟成才子恨梅花久斷玉人吹  
徘徊閣影樓頭我全不思鄉淚已垂

張元昇字時升號半園又號赤石山人江陰人諸生有

半園集

詩話半園孤介絕俗詩有高格游蹤徧浙閩秦隴中年歸隱荒江之濱不與人接沈歸愚未相識也採其詩入別裁集嘗寄詩贈之有云潮回疑蝕岸雲動欲移山穴並臺佟鑿門同栗里關頗致推挹

寒夜

細雨撲南窗孤鴻愁北渚寒夜角音闌空階木葉聚于以  
臨高秋忽焉懷古處巢許已成名唐虞亦徒苦悲歌復長

嘯渺渺向誰語

東軒對月

今夕不爲樂明月竊笑之故人有好懷招我坐軒墀涼風  
颯然至葛巾吹欲敝金樽泛清醑滿酌不容辭蕭條人間  
世昔人渺難期

贈別雲間高日采

兀傲嗟予舊清狂識汝新蒼天憐骨格老眼拔風塵倚劍  
寒鐙夜題詩異國身從來嵇性嬾相對獨情親  
乍見真堪樂將歸卻可憐亂山孤客影斜日欲離天別淚  
江亭上鄉心馬首前淒涼分手處後會在何年

高秋

寂寞高秋晚微霜下古城西風吹鬢老落葉入詩情天地

孤鴻影關山畫角聲只思歸去好閒卧聽春鶯

舟中

一身嗟浪迹九月更浮舟宿鷺依蘋岸寒花逐亂流江雲  
昏帶雨市火細明樓漂泊孤帆暝悠悠動旅愁

冬日同徐息溟登野閣望華山殘雪弔李介立先生  
與子一登眺誰人載酒來江聲吹不盡煙色晚還開山遠  
明餘雪天高老異才寸心雙目裏何限夕陽哀

讀梧溪集感賦

牢落烏涇寓荒涼席帽峯艱危雙老鬢飄泊一孤筇天地  
詩邊淚江山客裏烽故邱何處問惆悵望雲松

度隴雜詠

寂寞經荒縣蕭條只幾家邊雲迷古堞嶂月冷清笳小市

都無米居民不解茶破檐門不設愁殺曉風斜

晚秋感懷

霜濃日瘦半溪陰一片西風百感侵窮海天高寒鬢影空  
山木落老秋心年荒貧病堅辭鶴竈冷淒涼泣問琴卻歎  
吟殘重寂寞更誰載酒過花林

金義植字立斯又號東塘吳縣人諸生有抗塵齋詩略

詩話東塘早受知於李穆堂與沈歸愚友善少作有  
好彈集誰定稟晚歲及薙僅存十之二三定名詩略  
歸愚評其詩曰清曰真並謂與其配唱酬楓江之濱  
耳聾不聞世事得安分自適之趣可想見其風概也  
清明前一日江上送友

朝雨霏微浥細塵露桃煙柳一番新粥香野店尋花路浪  
暝春江喚渡人遮住馬頭頻勸酒撥殘鳳尾欲沾巾韶光  
此際添惆悵芳草斜陽綠正勻

塘棲道中

西風瑟瑟水泠泠人倚蓬窗酒半醒  
秋老乍飛霜葉赤雨來旋失越山青  
賣絲市晚炊煙斷春穀聲微野戶扃  
前路淒迷何處宿愁聽哀雁下寒汀

歸愚述都門李穆堂侍郎話吳中故交殷勤見訊賦此志感

垂老成何事空慚吳下蒙逢人問無恙忽辱隴西公清節  
三朝重高文絕代雄龍門遠莫至彌感古人風

落木庵弔徐元歎先生

詩老風流盡猶傳落木庵孤根曾此託古佛直同龕竹塢  
雲盤樹天池月印潭幽尋一追賞煙鶴下山南

暮春訪曾大漁村讀其近詠有贈

重訪知心江水湄桃花紅落淺深枝鼓殘狂士春風瑟妙  
絕才人黃絹辭同屬暮年偏較老詎堪一別又經時石橋  
回首斜陽路長日重期細論詩

晚晴移詩匯卷六十三終